

Di acuerdo cu Fundacion Respetami

E ta nos deber pa raporta casonan di abuso sexual!

Hey...

Mi ta un mucha. Bo ta sospecha cu mi ta wordo abusa?

Yama Bureau Sostenemi na 588-1010

Corda cu bo por keda anonimo!

Nos tur por contribui na e bienestar y siguridad di nos muchanan.

Kere mi. Yuda mi. Respeta mi.



ORA nos scucha di casonan di abuso sexual di menor, comunidad ta sinti su mes conmovi. Diferente emocion di rabia y tristeza ta bin ariba. N'e momento ey nos no ta pensa racional. Nos ta pensa y reacciona a base di nos emocionnan.

Pero e ta importante pa realisa cu e ta un momento crucial, ora cu un mucha bin dilanti cu un caso di abuso sexual. Claro cu nos como adulto ta hay'e dificil pa reacciona na un manera racional, como cu nos kier proteha nos muchanan.

Na momento cu un mucha conta cu el a wordo mishu na un manera inapropia, cu of sin penetracion, ta bo deber di raporta esaki inmediatamente n'e instancia concerni. Ora un mucha conta bo cu el a pasa den abuso sexual no ta bo responsabilidad pa bay interroga e mucha y puntr'e yen di pregunta di e sucedido. Na momento cu nos reacciona na un manera emocional dilanti di un mucha y ta keda puntr'e yen di pregunta, cu e lo mester bay contesta despues atrobe serca Polis, bo por crea miedo y panico serca un mucha pa conta su caso.

E ta importante pa ta consciente cu e por ta traumatico pa un mucha conta su storia cada biaha serca un hende nobo y esaki por tin te hasta consecuencia p'e continuacion di e investigacion.

Aki'bou nos ta menciona tres paso pa tuma ora cu un mucha bin dilanti cu un caso:

Paso 1:

Reconoce e mucha su situacion y sentimiento. Scucha e mucha cuidadosamente. **NUNCA** entrevista e mucha. Esaki ta un parti hopi fastioso pa keda sin haci, pasobra bo kier sa exactamente kico a sosode, pero n'e momento aki e mucha mester pa bo djis scuch'e. No ta bo trabou pa entrevista e mucha, esaki Polis of Raadsonderzoekers di Voogdijraad ta haci.

Paso 2:

Consola e mucha. Record'e cu **NO** ta su fout cu el a pasa den abuso. Bis'e cu bo ta ker'e y cu bo ta bay yud'e.

Paso 3:

Despues di a papia cu e mucha, scirbi tur loke el a bisa. **NO** scirbi of haci anotacion ora e mucha ta presente, haci esaki ora cu e mucha no t'ey. Scirbi te hasta cosnan cu bo a ripara di su comunicacion no verbal.

Raporta e caso na Bureau Sostenemi dor di yama 588-1010. Si ta desea di denuncia e sospechoso, por haci esaki na Jeugd en Zeden Politie na Warda di Polis Playa.

Si e mucha ta bou di 16 aña, e denuncia mester wordo haci dor di un mayor of voogd.

Bo tin duda di e caso? Raporta esaki tog na Bureau Sostenemi! E bienestar y seguridad di un mucha of hoben por ta na peligro.

Bo no mester ta 100% sigur si e caso ta berdad of no. E t'e responsabilidad di autoridadnan local pa determina e hecho y evidencianan.

Pa mas informacion tocante abuso y negligencia di mucha yama Fundacion Respetami na 582-4433.